

中國文學研究典籍叢刊

〔明〕高 棟 編纂 汪宗尼 校訂 葛景春 胡永傑 點校

唐詩品彙

二

中華書局

中國文學研究典籍叢刊

唐詩品彙 二

〔明〕高 棟 編纂 汪宗尼 校訂
葛景春 胡永傑 點校

中 華 書 局

五言古詩卷之八

大家（二）

杜甫（下）

游覽九首

遊龍門奉先寺

已從招提遊，更宿招提境。陰壑生靈（今按，宋本《杜工部集》作「虛」）籟，月林散清影。天闕象
緯逼，雲臥衣裳冷。欲覺聞晨鐘，令人發深省。

望岳

岱宗夫如何，齊魯青未了。（劉云：即五字，雄蓋一世。范云：起句之超然者也。）造化鍾神秀，陰陽割昏曉。盪胸生層雲，決眴入歸鳥。會當凌絕頂，一覽衆山小。

陪李北海燕歷下亭

（李邕，時爲北海太守。）

東藩駐皂蓋，北渚凌清河。海右此亭古，濟南名士多。（劉云：題篇迪當如此。）雲山已發興，玉佩仍當歌。脩竹不受暑，交流空湧波。蘊真愜所遇，落日將如何。貴賤俱物役，從公難重過。

大雲寺贊公房

燈影照無睡，心清聞妙香。（劉云：便爾超悟。）夜深殿突兀，風動金琅璫。天黑閉春院，地

清棲暗芳。玉繩（星名）回斷絕，鐵鳳森翱翔。梵放時出寺，鐘殘仍殷（音隱）床。明朝在沃野，苦見塵沙黃。（劉云：如此自好。）

冬到金華山觀因得故拾遺陳公學堂遺跡

涪石衆山內，金華紫崔嵬。上有蔚藍天，垂光抱瓊臺。繫舟接絕壁，杖策窮縈迴。四顧俯層巔，淡然川谷開。雪嶺日色死，霜鴻有餘哀。焚香玉女跪，霧裏仙人來。陳公讀書堂，石柱仄青苔。悲風爲我起，激烈傷雄材。

西枝村尋置草堂地夜宿贊公土室二首

出郭吟（今按，宋本《杜工部集》卷三，《杜詩詳注》卷七作「吟」）細岑，披榛得微路。溪行一流水，曲折方屢渡。贊公湯休徒，好靜心跡素。昨枉霞上作，盛論巖中趣。怡然共攜手，恣意同遠步。捫蘿澀先登，陟嶽眩反顧。要求陽岡暖，苦陟陰嶺沍。惆悵老大藤，沉吟屈蟠樹。卜居意未展，杖策迴且暮。層巔餘落日，草蔓已多露。

其二

天寒鳥已歸，月出山更靜。（劉云：自然境，自然語。）土室延白光，松門耿疏影。躋攀倦日短，語樂寄夜永。明燃林中薪，暗汲石底井。大師京國舊，德業天機秉。從來支許遊，興趣江湖迴。數奇謫關塞，道廣存箕穎。（今按，據宋本《杜工部集》卷三，當爲「穎」。）何知戎馬間，復接塵事屏。幽尋豈一路，遠色有諸嶺。晨光稍朦朧，更越西南頂。

同諸公登慈恩寺塔

（時高迪、薛據先有此作。）

高標跨蒼穹，烈風無時休。（范云：承以「烈風無時休」五字，今人能之否？）自非曠士懷，登茲翻百憂。方知象教力，足可追冥搜。（范云：遊、觀、寺、詩，十字同到。）仰穿龍蛇窟，始出枝撐幽。七星在北戶，河漢聲西流。羲和鞭白日，少昊行清秋。泰山忽破碎，（一作「秦」。劉云：樊察序本如此，近是。）（今按，「秦」，宋本《杜工部集》卷一，《杜詩詳注》卷二，《文苑英華》卷二三四皆作「秦」；《杜詩詳注》注云：一作「秦」）涇渭不可求。俯視但一氣，焉能辯（今按，據宋本《杜工部集》，當爲「辨」）皇州。

迴首叫虞舜，蒼梧雲正愁。惜哉瑤池飲，日宴（今按，據姚本、四庫本、宋本《杜工部集》卷一、《杜詩詳注》卷二，當爲「晏」）昆崙丘。黃鵠去不息，哀鳴何所投。君看隨陽鴈，各有稻粱謀。

望岳

南岳配朱鳥，秩禮自百王。歛吸領地靈，瀕洞半炎方。邦家用祀典，在德非馨香。巡狩何寂寥，有虞今則亡。洎吾隘世網，行邁越瀟湘。渴日絕壁出，漾舟清光傍。祝融五峰尊，峰峰次低昂。紫蓋獨不朝，爭長巒相望。恭聞魏夫人，羣仙夾翱翔。有時五峰炁，散風如飛霜。牽迫限脩途，未暇杖崇岡。歸來覲命駕，沐浴休玉堂。三歎問府主，曷以贊我皇。性壁忍衰俗，神其思降祥。

懷古二首

玉華宮

（梅聖俞云：宮近晉符堅墓。）

溪回松風長，蒼鼠竄古瓦。不知何王殿，遺構絕壁下。（劉云：哀思苦語，轉換簡遠，有長篇餘韻。

未更自傷悲」今按，明玉几山人刻本《集千家注杜工部詩集》卷三，無「悲」字，非意所及。）陰房鬼火青，壞道哀

湍瀉。萬籟真笙竽，秋色正瀟灑。美人爲黃土，況乃粉黛假。當時侍金輿，故物獨石馬。

憂來藉草坐，浩歌淚盈把。冉冉征途間，誰是長年者。（劉云：起結淒「今按，據明玉几山人刻本，

四庫本《集千家注杜工部詩集》卷三，當爲「淒」黯，讀者殆難爲情。）

九成宮

（本隋仁壽宮也，貞觀間，修之以避暑，因更名焉。山有九重，故名九成。）

蒼山入百里，崖斷如杵臼。層宮憑風迴，岌嶭土囊口。立神扶棟梁，鑿翠開戶牖。（劉云：

二語雄稱。）其陽產靈芝，其陰宿牛斗。紛披長松倒，揭怪石走。哀猿啼一聲，客淚迸林

藪。荒哉隋家帝，製此今頽朽。向使國不亡，焉爲巨唐有。雖無新增修，尚置官居守。

巡非瑤水遠，跡是雕牆後。（劉云：感歎之，尤得體者也。）我來屬時危，仰望嗟歎久。天王守太

白，（趙次公云：言肅宗在鳳翔。）駐馬更搔首。（范云：國亡，唐有此，有國家者後車之戒。〔今按，據黃永武主編《杜詩叢刊》本《杜工部詩范德機批選》卷一，此乃〔向使國不亡，焉爲巨唐有〕句下批語，原文無「國亡，唐有此」之語〕末意嘗不戒者也，此所以駐馬而後搔首也。杜子美之沉鬱頓挫類此也。〔今按，此乃〔駐馬更搔首〕句下批語〕

經行七首

赤谷西崦人家

躋險不自安，出郊已清目。溪迴日氣暖，徑轉山田熟。鳥雀依茅茨，藩籬帶松菊。如行武陵暮，欲問桃源宿。

過津口

南岳自茲近，湘流東逝深。和風引桂楫，春日漲雲岑。迴首過津口，而多楓樹林。白魚

困密網，黃鳥喧嘉音。物微限通塞，惻隱仁者心。瓮餘不盡酒，膝有無聲琴。聖賢兩寂寞，眇眇獨開襟。（趙次公云：白魚、黃鳥，物之通塞，雖微而不足道，而仁者於物每惻隱其困塞。〔今按，據《九家集注杜詩》卷十六，此乃「白魚困密網」至「惻隱仁者心」四句下評語〕於此琴酒，思聖賢寂寞，亦自適耳。〔今按，此乃「瓮餘不盡酒」至「眇眇獨開襟」四句下評語〕

次空舂岸

沄沄逆素浪，落落展清眺。幸有舟楫遲，得盡所歷妙。空舂霞石峻，楓栝隱奔峭。青春猶無私，白石亦偏照。可使營吾居，終焉託長嘯。毒瘴未足憂，兵戈滿邊徼。嚮者留遺恨，耻爲達人誚。迴帆覬賞延，佳處領其要。

羌村三首

（時自鳳翔還鄜州。蔡夢弼云：鄜州州治洛交縣。羌村，洛交村墟。）

崢嶸赤雲西，日脚下平地。柴門鳥雀噪，歸客千里至。妻孥怪我在，驚定還拭淚。世亂遭飄蕩，生還偶然遂。鄰人滿牆頭，感歎亦歔歔。夜闌更秉燭，相對如夢寐。（劉云：當時

迪然，千載之淚，常在人目，《詩三百》不多見也。）

其二

晚歲迫偷生，還家少歡趣。嬌兒不離膝，畏我復卻去。憶昔好追涼，故繞池邊樹。蕭蕭北風勁，撫事煎百慮。賴知禾黍收，已覺糟牀注。如今足斟酌，且用慰遲莫。

其三

羣雞正亂叫，客至雞鬪爭。驅雞上樹木，始聞叩柴荆。父老四五人，問我久遠行。手中各有攜，傾榼濁復清。苦辭酒味薄，黍地無人耕。兵革既未息，兒童盡東征。請爲父老歌，艱難愧深情。歌罷仰天歎，四坐淚縱橫。

述懷

（公家寓鄆州三川，時自賊中達行在所作也。）

去年潼關破，妻子隔絕久。今夏草木長，脫身得西走。麻鞋見天子，衣袖露兩肘。朝廷愍生還，親故傷老醜。涕淚受拾遺，流離主恩厚。柴門雖得去，未忍即開口。寄書問三川，不知家在否。比聞同罹禍，殺戮到雞狗。山中漏茆屋，誰復依戶牖。摧頽蒼松根，地冷骨未朽。幾人全性命，盡室豈相偶。嶽崑猛虎場，鬱結回我首。自寄一封書，今已十月後。反畏消息來，寸心亦何有。（陳後山云：不敢問何如。劉云：極一時憂傷之懷，賴自能賦，而毫髮不失。）漢運初中興，生平老耽酒。沉思歡會處，恐作窮獨叟。

懷思四首

得舍弟消息

風吹紫荊樹，色與春庭暮。花落辭故枝，風回反無處。骨肉恩書重，漂泊難相遇。猶有淚成河，經天復東注。（劉云：苦心怨調，使人淒然，終鮮之痛，潛於《脊令》。死喪之喻，未有如此句之苦者。末尤可念，非深痛不能道。）

夢李白二首

（白坐永玉璫事，當誅，會赦，還潯陽，復坐事下獄。）

死別已吞聲，生別常惻惻。（劉云：使其死耶，當不復哭矣，乃使人不能忘者，生別故也。）江南瘴癘地，逐客無消息。故人入我夢，明我長相憶。恐非平生魂，路遠不可測。魂來楓林青，魂返關塞黑。君今在羅網，何以有羽翼。落月滿屋梁，猶疑照顏色。水深波浪闊，無使蛟龍得。（劉云：落月、屋梁，偶然實景，不可再遇。）

其二

浮雲終日行，遊子久不至。（劉云：起語千言萬恨。）三夜頻夢君，情親見君意。告歸常局促，苦道來不易。（劉云：夢中賓主語，具是。）江湖多風波，舟楫恐失墜。出門搔白首，苦負平生志。冠蓋滿京華，斯人獨憔悴。（劉云：語出情痛，自別。）孰云網恢恢，將老身反累。千秋萬歲名，寂寞身後事。（劉云：結極慘淡，情至語塞。）

幽人

（師古云：按，《唐史拾遺》：惠昭、荀珣與甫友善，此詩思二子也。）

孤雲亦羣遊，神物有所歸。麟鳳在赤霄，何當一來儀。往與惠荀輩，中年滄洲期。天高無消息，棄我忽若遺。內懼非道流，幽人在瑕疵。洪濤隱語笑，鼓枻蓬萊池。崔嵬扶桑日，照耀珊瑚枝。風帆倚翠蓋，莫把東皇衣。嚙漱元和津，所思煙霞微。知名末足稱，局促商山芝。五湖復浩蕩，歲暮有餘悲。

尋訪二首

夏日李公見訪

（即李炎，時爲太子家令。）

遠林暑氣薄，公子過我游。貧居類村塢，僻近城南樓。傍舍頗淳樸，所願亦易求。隔屋喚西家，借問有酒不。牆頭過濁醪，（劉云：實事，他人以爲不足道。）展席俯長流。清風左右至，（劉云：自得迪然。）客意已驚秋。巢多衆鳥鬪，葉密鳴蟬稠。苦遭此物聒，孰謂吾廬幽。水花晚色靜，庶足充淹留。預恐尊中盡，更起爲君謀。

晦日尋崔戢李封

朝光入甕牖，戶寢驚弊裘。起行視天宇，春氣漸和柔。興來不暇懶，今晨梳我頭。出門無所待，徒步覺自由。杖藜復恣意，免值公與侯。晚定崔李交，會心真罕儔。每過得酒

傾，二宅可淹留。喜結仁里歡，況因令節求。李生園欲荒，舊竹頗脩脩。引客看掃除，隨時成獻酬。崔侯初筵色，已畏空尊愁。（劉云：寫得農「今按，據姚本、四庫本《集千家注杜工部詩集》卷四，當爲「濃」至。）未知天下士，至性有此不。草芽既青出，蜂聲亦暖游。思見農器陳，何當甲兵休。上古葛天氏，不貽黃屋憂。至今阮籍等，熟醉爲身謀。威鳳高其翔，長鯨吞九州。地軸爲之翻，百川皆亂流。當歌欲一放，淚下恐莫收。濁醪有妙理，庶用慰沉浮。

寄贈二首

別唐十五誠因寄禮部賈侍郎至

九載一相逢，百年能幾何。復爲萬里別，送子山之阿。白鶴久同林，潛魚本同河。未知棲集期，衰老強高歌。歌罷兩悽惻，六龍忽蹉跎。相視髮皓白，況難駐羲和。胡星墜燕地，漢將仍橫戈。蕭條四海內，人少豺虎多。少人慎莫投，多虎信所過。飢有易子食，獸有畏虞羅。（梅聖俞云：此等語含蓄深矣！殆不可模倣。）子負經濟才，天門鬱嵯峨。飄飄迪東

周，來往若奔波。南宮吾故人，白馬金盤陀。（蔡夢弼云：昔賈逵爲禮部侍郎，常乘白馬，故於至亦云。金盤陀，未詳，或云山名。）雄筆映千古，見賢心靡他。念子善師事，歲寒守舊柯。爲吾謝賈公，病肺卧江沱。

贈衛八處士

（公與李白、高適、衛賓相友善，賓年最少，號「小友」。）

人生不相見，動如參與商。今夕復何夕，共此燈燭光。少壯能幾時，鬢髮各已蒼。訪舊半爲鬼，驚呼熱中腸。焉知二十載，重上君子堂。昔別君未婚，兒女忽成行。怡然敬父執，問我來何方。問答未及已，兒女羅酒漿。夜雨剪春韭，新炊間黃粱。主稱會面難，一舉累十觴。十觴亦不醉，感子故意長。明日隔山岳，世事兩茫茫。（劉云：《陽關》之後，此語爲暢。）

感興九首